



# Pitchwise Izvještaj 2024

**mi to možemo**  
uraditi - promijeniti - pokrenuti





## PitchWise Festival ženske umjetnosti i aktivizma u BiH,

koji se organizuje od 2006. godine, postao je zaštitni znak Fondacije CURE kao jedinstven feministički međunarodni događaj koji objedinjuje aktivizam i angažovanu umjetnost. Festival je pokrenut s namjerom da zauzmemo napuštene javne prostore i transformišemo ih u mjesta susreta za društveno angažovane umjetnice, aktivistkinje, teoretičarke i feministkinje, kako bi se osigurao siguran i otvoren prostor za novu generaciju. Kroz solidarnost i umreženost sa ženama širom svijeta, nastojimo kreirati historiju otpora i boriti se za ravnopravnost svih žena.

**Osnovni cilj** PitchWise Festivala je stvaranje i promocija pozitivnih promjena u okruženju kroz umjetničke prakse i društveni angažman.

### PitchWise Festival se zalaže za:

- Promovisanje feminističkih ideja i politika.
- Ohrabrivanje mladih djevojaka i žena da se uključe u ženski pokret i doprinesu rekonstrukciji stvarnosti.
- Otvaranje novih polja djelovanja kroz dijalog i inicijative žena s različitim iskustvima i historijama.

Politička pozicija Fondacije CURE, iz koje nastaje PitchWise Festival, predstavlja osnovnu prizmu našeg djelovanja kroz feministički aktivizam usmjeren na pokretanje pozitivnih društvenih promjena. PitchWise Festival ukorijenjen je u ideji da transformativna moć umjetnosti potiče i osnažuje pojedinke da pozitivno promijene sebe i svoje okruženje. Politički angažovanu umjetnost razumijemo kao kreativni proces propitivanja, analize, transformacije i dekonstrukcije vlastitih pozicija i uloga u društvu, kao i pitanja identiteta unutar raznolikog spektra stvarnosti.

PitchWise Festival, održan od 12. do 15. septembra 2024. godine u Historijskom muzeju Bosne i Hercegovine u Sarajevu, još jednom je potvrdio svoju važnost kao jedinstven feministički događaj u BiH. XIX izdanje festivala okupilo je umjetnice, aktivistkinje, teoretičarke i feministkinje iz cijelog regiona i svijeta, s ciljem promocije ženske umjetnosti i kulture, rodne ravnopravnosti i pozitivnih društvenih promjena.

**Otvorenje festivala** započelo je 12. septembra energičnim nastupom Bubnjarske Aktivističke Mreže (BAM) iz Hrvatske, Srbije i BiH, koji je simbolično postavio ton za angažovani program koji je uslijedio, uključujući i izložbu Otvorenje muzeja iz ženske perspektive kustosice Elme Hodžić. Izloženi su radovi sljedećih umjetnica: Nanda Agić, Arnela Lela Dabić, Aleksandra Kokotović, Ata Omerbašić, Sonja Radan, Aida Šehović, Kiana Hayeri, Belma Arnautović, te Udruženja Stripo-Tetke.


Detalje s otvaranja, kao i kompletan program festivala, možete pogledati na YouTube kanalu Fondacije CURE i ostalim društvenim mrežama.


**YouTube Kanal:** <https://www.youtube.com/@fondacijacure2069/videos>




PitchWise Festival ženske umjetnosti i aktivizma, koji je proširio svoje djelovanje i na online platformu, za četiri dana privukao je veliku pažnju na društvenim mrežama, što govori o značaju i uticaju ovog događaja, ne samo na lokalnom nivou.

Festival je ostvario sljedeći broj lajkova/pregleda/dijeljenja:

 Za četiri dana postale smo zvijezde Instagram storija i imale **34.901** pregleda

 Na Facebooku smo privukle **27.068** pregleda. U međuvremenu, pridružilo nam se više od 60 novih pratitelja/ica. S obzirom da CURE vole zajedništvo, solidarnost, interakciju sa virtuelnim prijateljima/cama, možemo reći da smo postale prava mala feministička zajednica!

 Naš livestream ostvario je nevjerovatnih **3.121** minuta pregleda! Svaka minuta predstavlja podršku i zajedništvo, a to je ono što nas inspiriše.

Tokom četiri dana, PitchWise Festivala je ugostio **više od 400 učesnica i učesnika**, učesnika koje/i su imali priliku sudjelovati u bogatom programu te raznovrsnim edukativnim i kreativnim aktivnostima. Posjetiteljice i posjetitelji mogli su prisustvovati radionicama kao što su:

- **Radionica "Sama svoj majstor" / "Žena na djelu":** Naučite praktične vještine i probudite svoju unutrašnju majstoricu.
- **Kreativna radionica s glinom:** Izrazite svoju kreativnost kroz rad s glinom.
- **Radionica plesa:** Povežite se kroz pokret i ples.
- **Radionica fotografije:** Uхватite suštinu feminističkog aktivizma kroz objektiv.

Osim radionica, učesnice i učesnici su imali priliku aktivno učestvovati u panelima gdje su se diskutovala važna društvena pitanja, uključujući:

- **Govor mržnje:** Razumeti i boriti se protiv rastućeg govora mržnje u našim zajednicama.
- **Femicid:** Kritična diskusija o femicidu i načinima kako riješiti ovaj gorući problem.
- **Politike nejednakosti:** Razmatranje prava i sloboda koje ugrožavaju antirodni narativi i načini pružanja otpora.
- **Pobunjene čitateljice:** Angažirajte se uz feminističku literaturu i sudjelujte u provokativnim raspravama.

Takođe, tokom festivala imale smo čast promovisati dvije knjige: "**Aktivizam u ženskom pokretu u Bosni i Hercegovini - izazovi, iskoraci i društvene promjene**" autorice Zlatiborke Popov-Momčinović i "**Regionalna istorija feminizma i borbe za prava žena kroz tekstove jugoslovenskih autorki**", te predstaviti književni izbor Štefica Cvek #3.

Održana je promocija dokumentarnog filma "**Beyond Silence (Izvan šutnje)**", nastalog u produkciji IAMANEH Switzerland, organizacije "Žena ženi" iz Albanije, Savjetodavne linije za žene i djevojke iz Albanije, te Švicarskog tropskog instituta za javno zdravstvo.



Također, festival je uključivao i izvedbu predstave "Moram ti nešto reći", u produkciji JU BNP Zenica, te bogat muzički program uz nastup Lane Hamze i benda, Panduri, te stand-up nastup Duške Mušić i Anite Šunjić.

Detaljni program festivala možete pronaći na stranici Fondacije CURE:

<https://fondacijacure.org/program-pitchwise-festivala/>



PitchWise festival ženske umjetnosti i aktivizma video možete pogledati na

slijedećem linku: <https://www.youtube.com/watch?v=yVgvN6nUodw>

Tema ovogodišnjeg festivala naglašavala je moć i jedinstvo žena i djevojaka koje su se okupile kako bi pokrenule značajne društvene promjene:

### **Ja, Ti, Mi veličanstvene feministkinje Mi to možemo uraditi – pokrenuti – promijeniti!\***

PitchWise je i ove godine, kao i proteklih devetnaest godina, ostvario svoj cilj – spojile smo i slavile različitost, snagu i dostignuća žena, istražujući njihovu dobrobit kroz brojne događaje i aktivnosti uz podršku umjetnica, teoretičarki, muzičarki i aktivistkinja iz BiH, regije i svijeta.

Životi žena diljem svijeta izloženi su različitim opresivnim politikama koje ograničavaju slobode i dovode do nasilja nad ženskim tijelom. Svakodnevno smo pružale otpor, mijenjajući nametnute predrasude i stereotipe, dajući svoj doprinos borbi protiv radikalizma, nacionalizma, patrijarhata i svih oblika konzervativizma.

Program festivala bio je otvoren za sve koji podržavaju razvoj ženskog pokreta i feminističke misli u BiH i regiji. Okupljale smo se, slavile postignuća i inspirisale jedna drugu da nastavimo s pozitivnim društvenim promjenama. Po PitchWise tradiciji, sudjelovanje u svim događajima bilo je besplatno.

Hvala svim prijateljima/cama, aktivistima/kinjama, donatorima/kama i volonterima/kama koji/e su omogućili/e održavanje XIX PitchWise Festivala ženske umjetnosti i aktivizma u Sarajevu!

**Vidimo se naredne godine na jubilarnom dvadesetom PitchWise Festivalu ženske umjetnosti i aktivizma od 11. do 14. septembra 2025. godine!**





Dijelimo s vama **nekoliko refleksija učesnika i učesnica** koji/e su svojim iskustvima i prisustvom obogatili ovaj jedinstveni događaj. Njihove priče i utisci dodatno naglašavaju važnost prostora koji smo zajedno stvorili za umjetnost, aktivizam i zajedničku borbu za ravnopravnost.



"Drage moje Cure, koristim priliku da vam se zahvalim na organizaciji još jednog divnog i korisnog festivala. Bilo mi je zadovoljstvo učestvovati, steći nova znanja, vještine, ali i upoznati nove aktivistkinje i borkinje. Vraćamo se ohrabreni da nastavimo svoje borbe."

"Koristim priliku da zahvalim timu Fondacije CURE na strukturiranoj organizaciji 19-og PitchWise Festivala, koji je obuhvatio širok spektar pitanja i izazova u razvoju ženskog pokreta u BiH."

"Ženska aktivistička regionalna mreža solidarnosti, društvenog aktivizma, hrabrosti i odlučnosti, jedinstvena je, iz dana u dan sve veća i sve jača. Hrabro i odlučno. Sve za jednu, jedna za sve. ❤️ Žene su nama popločale puteve, a mi ih nastavljamo popločavati kako bi one koje dolaze poslije nas stigle što lakše, što dalje i cilju što bliže. Divno je biti nekome nešto."

"Divno iskustvo i divne žene s kojima sam komunicirala i družila se. Dosta sam naučila na panelima koje sam slušala i drago mi je što sam imala priliku čuti priče različitih i hrabrih žena. Festival je stvarno divan i nadam se da ću biti tu i sljedeće godine!"



Heart & Hand Fund



THE SIGRID RAUSING TRUST





